

«Ina clera campagna cunter nus»


Pbd dal Grischun be pli cun in candidat

DA GION NUTEGN STGIER / ANR

■ **La decisiun da sa retrair sco candidat per la regenza saja stada ina decisiun persunala, ha ditg Andreas Felix. La finamaira saja ussa da segirar il sez da cusseglier Jon Domenic Parolini e d'avair er suenter las elecziuns chantunales ina ferma fracziun, sco fin ussa, ha punctuà Gian Michael, il schef da fracziun.** Anc avant la radunanza da delegads da la Partida burgais-democratica svizra da sonda a Sievgia (Seewis) ha la pbd grischuna mussà colur. Cuzunt mussà colur ha *Andreas Felix*, il president da la pbd dal Grischun e candidat per la regenza grischuna. Sco mainagestiun da l'Uniun chantunala dals impressaris da construcziun è dapi intgins dis vegnì renfatschà ad el d'esser involvè e da savair da las cunvegns pertutgant il cartel da pretschs tar surdadas da lavur d'intginas firmas da construcziun da l'Engiadina Bassa. Venderdi saira ha el fatg politicamente in stritg persunal e fatg public sia renunzia sco candidat per la regenza da noss chantun. El sa retira immediat er sco president da la pbd grischuna ed er sco deputà saja ses pensum a fin, ha ditg Felix. Quai che pertutga il cartel da pretschs vegn segir anc ditg ad esser in tema per auters represchentants da la politica, per ils interprediders da construcziun e cuzunt er per ils meds da massa.

Segir permanentamain il tema

Felix ha ditg a Sievgia che davart da la partida na saja el betg vegnì mess sut pressiu da sa retrair sco candidat per la regenza. Suenter avair discurrì cun sia dunna haja el en cuminanza cun ella decidì da far quel zap. El na vul en nagin cas esser in empatg per la pbd en il cumbat electoral en vista a las elecziuns da la regenza e dal parlament. Ultra da quai avess el las proximas sis emnas strusch savì far in cumbat electoral serius e star tar ils fatgs factics tar mintga occurrenza publica en connex cun las elecziuns dals 10 da zercladur. Felix ha ditg ch'el tema dals pretschs da las firmas da construcziun engiadinaises e sia persuna fissan permanentamain in tema tar las discussiuns al podì empè dals affars reals per persuader mintgin da dar ad el la vusch, ha menziunà l'um da la pbd.



Da preschent gi da dar savens pled e fatg als meds da massa: Gian Michael, il schef da fracziun da la pbd.

FOTOS G. N. STGIER

Sapientivamain na legi las gasettas

El sa chattia bain d'avair fatg quel zap da renunziar a la candidatura, ha ditg Felix. Per betg savair tut quai che las medias hajan scrit l'emna passada n'haja el sapientivamain er betg legi bieras gasettas. Da surventscher tut quella critica haja el avunda forza, bler sustegn dals cunfamigliars ed er da ses amis da partida, ha punctuà l'um da Haldenstein. El saja stà gugent deputà dapi il 2006, president da la pbd e schef da fracziun. Ussa vegnia el a sa concentrar sin sia lavur sco mainagestiun dals impressaris grischuns, in pensum che stettia ad el fitg a cor.

Da buna speranza

Dapi trais dis è er enconuschent che la pbd vegn en il futur be ad esser represchentada cun in sez en la regenza grischuna, premess che *Jon Domenic Parolini* resta en ses uffizi. Senza laschar fastiz vegn el strusch a mitschar da las turbulenzas economicas e politicas dals davos dis. *Gian Michael*, il schef da fracziun da la pbd e manader dal cumbat electoral, ha ditg cler che ussa saja il focus be sin la reelecziun da Parolini e sin la finamira da mantegnair almain ils 27 sez da la pbd en il cussegl grond. El ha ditg che 33 persunalitads da la pbd candideschian per il

cussegl grond e lura er anc 25 persunas per il post da suppleant-deputà. Michael è dentant da buna speranza ch'il suveran grischun stat davos la pbd che fetschia politica reala, constructiva e seriusa.

Per mai nagin tema

Da vegnir ussa cun in ulteriur candidat per Felix, quai saja aifer la direcziun da la pbd strusch stà in tema. Er el n'avess betg sa mess a disposiziun per ina candidatura, quai che blers avessan vesì gugent. Da candidar per la regenza saja per el insomma mai stà in tema. Sapientivamain haja la pbd gia fatg la fin da mars 2017 las nominaziuns cun Parolini e Felix ed er mess l'entira forza en quels dus. Il deputà da la Val Schons è anc adina da l'opiniun che Felix fiss stà in rinforz per la regenza grischuna. Persvas è il schef da fracziun da la pbd er che la critica vers Felix è stada ina clera campagna cunter la partida, da supponer saja danunder, dentant concret n'ha il deputà ditg nagut.

Las schanzas èn minimas

Ier è dentant vegnì enconuschent che la pbd preschenta eventualmain tuttina in segund candidat ubain ina candidata per il post da Felix. Quai ha almain ditg Michael a singulas medias. La schanza da

chattar ina persuna per quella intenziun saja bain pitschna. Insatge è segir, vegniss la pbd cun ina dunna, lura avess quella anc in pau speranza da daventar cussegliera governativa, la realitad è bain che a la partida manca da preschent ina dunna cun in profil da l'antieriura cussegliera federala *Eveline Widmer-Schlumpf*.

Sche Felix di na, lura na crai nagin

Martin Landolt, il president svizzer da la pbd, deplorascha fitg la renunzia da Felix da tuttina candidar per la regenza. Il Glarunais ha er ditg che la pbd n'avess en nagin cas laschà crudar el, quai che autras partidas fetschian senza scrupels. La realitad saja er che sche Felix ditgia ch'el savevia nagut da la cunvegna da pretschs tranter ils impressaris da construcziun, lura na craja l'entira Svizra betg che quai saja uschia, ma sch'in cusseglier dal chantun Grischun fetschia quai, lura crajan tuts ad el. Landolt quinta che las confusiuns enturn la persuna da Felix hajan pouca influenza sin las elecziuns chantunales sco per exempel en il chantun Glaruna ed er en noss chantun. Felix merita en tuts cas respect, quai che er *Benno Niggli*, il vicepresidente da la pbd, ha accentuà repetidamain a Sievgia.



Andreas Felix avess gi da vegnir successur da cussegliera governativa Barbara Janom Steiner. Quai è dentant istorgia.